

四庫全書

子部

欽定四庫全書

子部

證治準繩卷五十二

詳校官太醫院醫士臣程泰

編修臣倉聖脈覆勘

總校官進士臣朱鈐

校對官編修臣盧遂

謄錄監生臣朱鎮

欽定四庫全書

證治準繩卷五十二

明 王肯堂 撰

傷寒

脈

脈法上

問曰脈有陰陽者何謂也答曰凡脈大浮數動滑此名陽也脈沉澁弱弦微此名陰也凡陰病見陽脈者生陽

病見陰脈者死

成陽道常饒大浮數動滑五者比之平脈也有餘故  
謂之陽陰道常虧沉瀦弱弦微五者比之平脈也不  
及故謂之陰傷寒之為病邪在表則見陽脈邪在裏  
則見陰脈病見陽脈而主生者則邪氣自裏之表欲  
汗而解也如厥陰中風脈微浮為欲愈不浮為病未退  
者是也陽病見陰脈而主死者則邪氣自表入裏正  
虛邪勝如讖言妄語脈沉細者死是也 大綱當以

靜躁處言下後靜者生躁者死不可拘以陰病見陽  
脈邪氣外散也陽病見陰脈邪氣乘虛而入也 丹  
謹按經言大浮數動長滑為陽沉濇弱弦短微為陰  
論之略去長短二脈其意何在若以傷寒為病無長  
短脈耶仲景之書言長短者蓋不少也經脈二十  
種形狀亦無長短二脈又何耶見字恐當作得字說  
猶言表病得裏脈裏病得表脈若作自表入裏說莫  
有礙否夫太陽病不解以漸次傳入陽明少陽又三

陽經之病不解以漸次傳入于府悉是可愈之病又  
有不傳經不加異氣者七日後自太陽以漸次傳入  
陽明少陽與三陽經亦皆為不治自愈之證非自表  
入裏者乎初未嘗死此吾之所以不能無疑也考之  
論中陽病得陰脈有本病自得者有因醫而得者仲  
景著治法甚詳如太陽病得之八九日如瘧狀發熱  
惡寒熱多寒少不嘔清便欲自愈一日二三度發脈  
微緩者為欲愈也夫脈微而惡寒者此陰陽俱虛不

可更發汗更下更吐也夫太陽病如瘧狀發熱惡寒  
非陽病乎曰脈微非陰病乎又傷寒五六日頭汗出  
微惡寒手足冷心下滿口不欲食大便鞭脈細者此  
為陽微結必有表復有裏也汗出為陽微假令純陰  
結不得復有外證悉入在裏此名半在裏半在表也  
脈雖沉緊不得為少陰病所以然者陰不得有汗今  
頭汗出故知非少陰也可與小柴胡湯夫仲景行小  
柴胡湯非陽病乎曰脈微曰脈沉非陰脈乎此皆陽

病之得陰脈者悉是兼迷證之陰陽如此者不一未  
暇枚舉誠思論意固是因病察脈求其所謂陰陽而  
為生死之辨謂之傳經者必須推廣先賢之意以開  
後學倘非推明證之陰陽惟以脈與病參之則後學  
何所適從此吾之所以重有疑也 張或謂經言大  
浮數動滑此名陽也沉瀋弱弦微此名陰也夫高陽  
生又以弦脈編入七表而為陽者何也弦者不足之  
脈也乃發汗後病在表裏之候也故云弦則為減所



以為陰也夫高陽生以弦為陽者因仲景云脈浮而  
緊者名曰弦也弦者狀如弓弦按之不移也只因一  
箇浮字故編入表脈也殊不知脈浮而弦病方在表  
當未汗之時則為緊也已經發汗之後則為弦也此  
一定之論大槩與緊相類然其時則不同但脈候玄微  
不若以未汗已汗為法則無差失之患矣 許仲景  
之意以弦脈為陰者兼合乎衆脈而言之也且浮大  
者陽也兼之以瀋弱弦微之類安得不為陰也若夫

沉微而弦沉濇而弦沉細而弦皆為陰證之脈也蓋少陽之脈弦者仲景之意以一脈而言之也然少陽之氣通于春春脈弦者以應春陽時令之脈也豈得不為陽乎如浮大而弦洪長而弦浮滑而弦浮數而弦者皆為陽也仲景以弦脈分陰陽二用之理其義微矣王叔和以弦脈為陽而不言弦為陰者是以獨指一脈而為雜病也故仲景之脈不可與雜病同日而語也

問曰脈有陽結陰結者何以別之答曰其脈浮而數能食不大便者此為實名曰陽結也期十七日當劇其脈沉而遲不能食身體重大便反鞭名曰陰結也期十四日當劇

成結者氣偏結固陰陽之氣不得而雜之陰中有陽陽中有陰陰陽相雜以為和不相雜以為結浮數陽脈也能食而不大便胃實也為陽氣結固陰不得而雜之是名陽結沉遲陰脈也不能食身體重陰病也

陰病見陰脈則當下利。今大便鞭者為陰氣結固陽不得而雜之。是名陰結傷寒之病。一日太陽二日陽明三日少陽四日太陰五日少陰六日厥陰至六日為傳經盡。七日當愈。七日不愈者謂之再經。言再經者再自太陽而傳至十二日再至厥陰為傳經盡。十三日當愈。十三日不愈者謂之過經。言再過太陽之經亦以次而傳之也。陽結為火至十七日傳少陰水水能制火。火邪解散則愈。陰結屬水至十四日傳陽

明土土能制水水邪解散則愈彼邪氣結甚水又不能制火土又不能制水故當劇內經曰一候後則病二候後則病甚三候後則病危也 一候五日受邪之初明惡寒發熱自有偏勝故下文云云

問曰病有灑淅惡寒而復發熱者何答曰陰脈不足陽往從之陽脈不足陰往乘之曰何謂陽不足答曰假令寸口脈微名曰陽不足陰氣上入陽中則灑淅惡寒也曰何謂陰不足答曰假令尺脈弱名曰陰不足陽氣下

陷入陰中則發熱也

成一陰一陽之謂道偏陰偏陽之謂疾陰偏不足則陽得而從之陽偏不足則陰得而乘之陽不足則陰氣上入陽中為惡寒者陰盛則寒矣陰不足陽氣下陷入陰中為發熱者陽盛則熱矣陽脈不足則惡寒也陰脈不足則發熱也丹按經言凡傷於寒則為病熱蓋寒客于經陽氣怫鬱而成熱故發熱寒傷于榮血血既受傷故惡寒屬太陽證又曰發熱惡寒

發于陽也。合此二者而觀，明是體雖熱，自惡寒，宜解表。則麻黃、青龍等主之。今曰灑淅惡寒而復發熱，當是寒熱往來，其屬表者宜小柴胡，其屬裏者宜大柴胡。其或已汗已下者，宜桂枝、乾薑湯。此三陽證論寒熱往來之平等者。如寒熱之或多或少，又當輕重較量而施治。法今曰陰不足則陽勝而熱，陽不足則陰勝而寒。又曰陽往從之，陰往乘之，當是陽併于陰，陰併于陽。岐伯曰：瘧氣者，更盛更虛，似與經文陽勝陰勝之意合。

未審為傷寒立論邪為瘧立論邪孰為是否 張或云

經言陰脈不足陽得從之陽脈不足陰得乘之不足  
乃陽脈微弱之謂所以惡寒發熱也又云脈盛身寒  
得之傷寒夫傷寒表病未有脈不浮盛者設或微弱  
即陽病見陰脈也二說參差必有其理此章論所以  
然之理非病已發於外而言也凡病傷寒者皆因榮  
衛不足是以尺寸之脈皆微弱外邪因得相襲使陰  
陽相乘故灑淅惡寒而復發熱也凡已病之脈則不



然若風併於衛則衛實而榮虛故桂枝證脈陽浮而陰弱若風寒併於榮衛則脈皆浮盛所以麻黃證當發其汗也仲景之書各有所指非淺見薄識所能知也

陽脈浮陰脈弱者則血虛血虛則筋急也

成陽為氣陰為血陽脈浮者衛氣強也陰脈弱者榮血弱也難經曰氣主煦之血主濡之血虛則不能濡潤筋絡故筋急也

其脈沉者榮氣微也

成內經云脈者血之府也脈實則血實脈虛則血虛此其常也脈沉者知榮血內微也

其脈浮而汗出如流珠者衛氣衰也

成鍼經云衛氣者所以溫分肉充皮毛肥腠理司開闔者也脈浮汗出如流珠者腠理不密開闔不司為衛氣外衰也浮主候衛沉主候榮以浮沉別榮衛之衰微理固然矣然而衰甚於微所以於榮言微而衛

言衰者以其汗出如流珠為陽氣外脫所以衛病甚於榮也

榮氣微者加燒針則血流不行更發熱而躁煩也

衛陽也榮陰也燒針益陽而損陰榮氣微者謂陰虛也內經曰陰虛則內熱方其內熱又加燒針以補陽不惟兩熱相合而榮血不行必更外發熱而內躁煩也

脈藹藹如車蓋者名曰陽結也

成藹藹如車蓋者大而厭厭聶聶也為陽氣鬱結於外不與陰氣和雜也按車蓋言浮大即前浮數之陽結也

脈累累如循長竿者名曰陰結也

成累累如循長竿者連連而強直也為陰氣鬱結於內不與陽氣和雜也按長竿者緊弦也即前沉遲之陰結也

脈瞥瞥如羹上肥者陽氣微也

成輕浮而主微也

脈縈縈如蜘蛛絲者陽氣衰也

成縈縈滯也若縈縈惹惹之不利也如蜘蛛絲者至細也微為陽微細為陽衰脈要曰微為氣痞是未至於衰內經曰細則氣少以至細為陽衰宜矣 按縈說文曰收卷也有回旋之義

脈綿綿如瀉漆之絕者亡其血也

成綿綿者連綿而軟也如瀉漆之絕者前大而後細

也正理論曰天樞開發精移氣變陰陽交會胃和脈生脈復生也陽氣前至陰氣後至則脈前為陽氣後為陰氣脈來前大後細為陽氣有餘而陰氣不足是知亡血 按瀉漆之絕已縱而忽收亡血之脈如之脈來緩時一止復來者名曰結脈來數時一止復來者名曰促陽盛則促陰盛則結此皆病脈

結促代皆動而中止但自還為結促不能自還為代無常數為結促有常數為代結促為病脈代為死脈

不可不辨雜病脈結促多有痰飲瘀血阻滯隧道而然不然者病多難治也太陽病下之脈促不結胸為欲解未必盡凶也少陰病手足厥冷脈促宜灸之非必皆陽盛也

陰陽相搏名曰動陽動則汗出陰動則發熱形冷惡寒者此三焦傷也若數脈見於關上上下下無頭尾如豆大厥厥動搖者名曰動也

陽升陰降二者交通上下往來於尺寸之內方且冲

和安靜焉觀所謂動者哉惟夫陽欲降而陰逆之陰欲升而陽逆之兩者相搏不得上下鼓擊之勢隴然高起而動脈之形著矣然必見於關上者何也以三部言之寸陽也尺陰也關陰陽之中也故曰陽出陰入以關為界是為陰陽升降往來之位者關也然則相搏而動不於此見之而誰見乎內經手少陰脈動甚者為妊子謂手少陰俞神門穴中脈動甚為有妊之兆非言動脈言動脈自仲景始龐安常曰關位占



六分前三分為陽後三分為陰若當陽寸口動而陰靜法當有汗而解素問曰陽加於陰謂之汗若當陰連尺動而陽靜則發熱素問曰尺羸為熱中若大汗後形冷惡寒者三焦傷此是死證按陰陽之氣寧謐則實躁動則虛或動乎陽或動乎陰陽動則陽虛矣故不能衛于膚腠而汗出陰動則陰虛矣故不能濡於肌肉而發熱仲景又云陽微則惡寒陰弱則發熱是也厥厥動搖者自為動搖不與三部脈混如人在

衆中不與衆合名之厥厥也後之說脈者指下尋之  
似有舉之還無再再尋之不往不來曰動則與仲景  
之言相反矣

陽脈浮大而濡陰脈浮大而濡陰脈與陽脈同等者名  
曰緩也

緩有遲緩之意又有和緩之意獨陽獨陰緩無自而  
見矣緩者非獨陰也有陽焉非獨陽也有陰焉二者  
合而成體緩脈之名自此而生方其陰陽雜以成和

也其色黃其顏光其聲商毛髮長乃冲氣之洋溢者也若夫發而為病即為虛為痺為氣戴氏曰每居中或下部間柔軟而慢但小於沉脈按之緩與此有邪之診為不及之緩陰陽氣和陽寸陰尺上下同等同浮大而軟無有偏勝此無邪之診為陰陽和緩之緩緩與遲二脈相類遲脈一息三至緩脈一息四至脈浮而緊者名曰弦也弦者狀如弓弦按之不移也脈緊者如轉索無常也

弦何以為肝脈耶肝木也以日言之甲者物始甲而未拆乙者陽尚乙屈而未伸以經言之少陽陽之少也厥陰陰之盡也以時言之春者萬物始生而未長素問曰脈奕弱輕虛以滑端直以長曰弦以陰中有陽也此曰浮而緊名曰弦浮者陽也緊者陰也陽而未離乎陰也故脈訣列之于陽而仲景列之于陰戴氏則以為半陰半陽之脈也浮字當以奕弱輕虛四字體會之脈訣沉之而曰指下尋之不足舉之有餘

則是有浮弦而無沉弦也經曰脈沉而弦者主懸飲  
內痛是沉中亦有弦也弦緊之狀並如引繩此既以  
緊釋弦又恐人混而無別故又別之曰指下不移如  
弓弦者弦脈也無常如轉索者緊脈也狀如弓弦按  
之不移即所謂端以長也端直以長者不轉也轉索  
無常者不端也端便是有常無常便是不端直耳凡  
病脈弦而軟易治弦而鞭難治又仲景曰脈至如轉  
索者其曰死為其緊急不軟無胃氣也轉索一也有

死生之分宜詳辨之

脈弦而大弦則為減大則為亢減則為寒亢則為虛寒  
虛相搏此名曰革婦人則半產漏下男子則亡血失精  
易曰革去故也革者改故從新之意夫人之脈方其  
水穀腐化心榮肺衛流行灌溉而充溢於百骸之中  
固自無變若夫虛寒停留經久不去則昔之充溢者  
今且改易而為勞傷枯瘁矣其脈弦而大是其體也  
何者弦則為減減則陽氣不足而為寒大則為亢亢

則陰血不足而為虛寒虛相搏氣血變易此名為革  
婦人得之則半產漏下男子得之則亡血失精也然  
諸脈為名多矣特此以革名之者豈非諸脈雖能為  
病此則既久而有改故之意歟然亦有暴而變此脈  
者雖名曰革但病未成有不藥而愈之道焉故經曰  
三部脈革長病得之死卒病得之生也脈訣云指下  
尋之則無按之則有此可以言革脈所見之位而失  
言革脈之本狀經言有似沉伏者革脈所居之位也

實而長微弦者革脈之形也要之大似實而弦似長  
總不離乎弦之與大而已惟其雜乎沉伏實長故又  
有牢之意此經以革與實相類而孫真人以革為牢  
諸脈書有牢則無革有革則無牢者皆為是歟

問曰病有戰而汗出因得解者何也答曰脈浮而緊按  
之反芤此為本虛故當戰而汗出也其人本虛是以發  
戰以脈浮故當汗出而解也若脈浮而數按之不芤此  
人本不虛若欲自解但汗出耳不發戰也問曰病有不



戰而汗出解者何也答曰脈大而浮數故知不戰汗出而解也問曰病有不戰不汗出而解者何也答曰其脈自微此以曾經發汗若吐若下若亡血以內無津液此陰陽自和必自愈故不戰不汗出而解也

邪氣將出其人本虛邪與正爭故發戰戰已然後汗出而解其人不虛邪不能與正爭故不發戰而汗出解虛不虛以脈之芤不芤別之芤乃草之有孔者正如卧蔥管於皮中輕取重取皆有而中取則無也經

云榮行脈中故以為血脫之候此所謂按即脈書所謂尋在浮舉沉按之間者也若邪氣已衰正氣又弱其脈自微則不戰不汗而解矣微脈原為吐下亡血之診凡得之者陽微禁發汗陰微禁下以陰陽不足故也或問此三者皆以脈決不審於什麼時候之曰發表之脈候其始欲解之脈觀其止假如柴胡湯證六七日每見弦脈今脈反浮欲解之候也若浮而芤者戰而汗出浮而數不芤者不戰而汗出夫脈凡與邪

併則浮大弦數必因汗下欲解而後微今脈自微此以曾經汗下內無津液陰陽自和故不戰不汗出而解矣此三脈皆於病將解之時而候之也

海藏云戰而後解者

太陽也不戰有汗而解者陽明也不戰無汗而解者少陽也

問曰傷寒三日脈浮數而微病人身涼和者何也答曰此為欲解也解以夜半脈浮而解者濺然汗出也脈數而解者必能食也脈微而解者必大汗出也

成傷寒三日陽去入陰之時病人身熱脈浮數而大

邪氣傳也若身涼和脉浮數而微者則邪氣不傳而欲解也解以夜半者陽生於子也脉浮主澀然汗出而解者邪從外散也脉數主能食而解者胃氣和也脉微主大汗出而解者邪氣微也 上言脉微故不汗出而解此言脉微而解必大汗出二說相左何耶曰上以曾經吐下亡血邪正俱衰不能作汗而解此以未經汗下血氣未傷正盛邪衰故大汗出而解不相左也

問曰脈病欲知愈未愈者何以別之答曰寸口關上尺中三處大小浮沈遲數同等雖有寒熱不解者此脈陰陽為和平雖劇當愈

陰陽偏而為病平而為和故雜病之脈內傷外感之不同則氣口人迎不等上下盛衰之不同則浮中沉尺寸不等況傷寒乎今寸關尺脈皆同等故為陰陽和平而自愈也針經禁服篇云寸口人迎兩者相應若引繩大小齊等者名曰平人言手之寸口脈與喉旁之人迎脈

齊等為平人後條云六脈陰陽俱停必先振慄汗出而解者是也或曰寸關尺各有本部當見之脈如前章所謂菽數輕重者春夏秋冬升降浮沉亦各有本部當見之脈各得其位而不踰其等故曰同等病當愈如成註所釋則寸浮而尺浮尺浮則反等矣何謂病愈

立夏得洪大脈是其本位其人病身體苦重疼者須發其汗若明日身不疼不重者不須發汗若汗濺濺自出者明日便解矣何以言之立夏得洪大脈是其時脈故

使然也四時倣此

此論不即病之傷寒也春弦夏洪秋毛冬石當其時得之則為平脈不治自愈非其時得之則為病脈須兼視其證而治之乃愈也夏得洪脈而其人病身體疼重此為邪客之故亦須治乃解倣此推之則春弦秋毛冬石有應脈之證者皆當治之而愈也

問曰凡病欲知何時得何時愈答曰假令夜半得病明日日中愈日中得病夜半愈何以言之日中得病夜半

愈者以陽得陰則解也夜半得病明日日中愈者以陰得陽則解也

太陽病已至未解陽明病申至戌解少陽病寅至辰解太陰病亥至丑解少陰病子至寅解厥陰病丑至卯解三陽晝解三陰夜解

寸口脈浮為在表沉為在裏數為在府遲為在藏假令脈遲此為在藏也

前云凡脈浮大數動滑此名陽也沉濇弱弦微此名



陰也九難曰何以別知藏府之病然數者府也遲者藏也數則為熱遲則為寒諸陽為熱諸陰為寒故以別知藏府之病也此傷寒分三陽三陰證之總訣歟若夫雜病則脈之數者藏亦有熱脈之遲者府亦有寒勿泥此也

跌陽脈浮而濇少陰脈如經也其病在脾法當下利何以知之若脈浮大者氣實血虛也今跌陽脈浮而濇故知脾氣不足胃氣虛也以少陰脈弦而浮纔見此為調

脈故稱如經也若反滑而數者故知當屎膿也

跌陽脈一名會元一名衝陽在脚背上去陷谷三寸  
脈動處乃足陽明胃經之動脈也胃者水穀之海五  
藏六府之長若胃氣以億水穀不進穀神以去藏府  
無所稟受其脈不動而死也故必診跌陽脈以察胃  
氣焉切脈下指輕重以為氣血之分浮而大者輕取  
有餘重取不足故為氣實血虛之診也若輕取之便  
不大而濇知脾胃之氣不足也脾胃之氣不足則轉

輸失職而下利之證見矣下利屬少陰證故云少陰  
脈如經也少陰之脈微細沉緊而此乃以弦而浮為  
調脈最宜活看應浮弦而反滑數知其便膿此桃花  
湯證也少陰動脈名太蹠在足內踝後跟骨上  
寸口脈浮而緊浮則為風緊則為寒風則傷衛寒則傷  
榮榮衛俱病骨節煩疼當發其汗也

風陽物也其體在外其傷在衛飄然流行于上者其  
脈不得不浮也寒陰物也其體在中其傷在榮摯然

繳急而斂縮者其脈不得不緊也榮衛俱病骨節煩  
疼當開戶以逐之故以麻黃發汗

跌陽脈遲而緩胃氣如經也跌陽脈浮而數浮則傷胃  
數則動脾此非本病醫特下之所為也榮衛內陷其數  
先微脈反但浮其人必大便鞭氣噫而除何以言之本  
以數脈動脾其數先微故知脾氣不治大便鞭氣噫而  
除今脈反浮其數改微邪氣獨留心中則飢邪熱不殺  
穀潮熱發渴數脈當遲緩脈因前後度數如法病者則

飢數脈不時則生惡瘡也

胃脈遲緩其本也若浮而數則病矣胃氣傷故虛虛故浮脾氣動故躁躁故數知為誤下之過也榮衛之氣脾胃之氣所為也胃傷脾動則內虛榮衛之邪乘虛而內陷則浮數二脈數脈先退而浮脈獨存其人必大便鞭氣噫而除也何以言之本以數脈動脾脾雖躁動不能持久故數脈先改而微因數改微故知脾氣不治脾氣不治則孰為津液津液少胃中乾燥

故知大便鞭脾病善噫得後與氣乃除故知氣噫而除也本以浮脈傷胃胃傷則止于傷而已故浮脈獨存不與數脈俱退邪氣獨留於脾無與于胃胃中空虛故飢而思食也胃能納脾不能化則食而不消所以然者脾中真火乃能殺穀邪熱不能殺穀也穀不化反增胃中之熱則潮熱而渴勢所必至矣

調胃承氣湯

若數脈不改微而徑改為遲緩病退之後與未病之前一息四至度數如法如是而飢飢而能食食即能

化不為患也若數脈不改遲緩又不改微非時而見則脾氣躁動不已脾主肌肉必生惡瘡也

師曰病人脈微而濇者此為醫所病也大發其汗又數大下之其人亡血病當惡寒後乃發熱無休止時夏月盛熱欲著複衣冬月盛寒欲裸其身所以然者陽微則惡寒陰弱則發熱此醫發其汗令陽氣微又大下之令陰氣弱五月之時陽氣在表胃中虛冷以陽氣內微不能勝冷故欲著複衣十一月之時陽氣在裏胃中煩熱

以陰氣內弱不能勝熱故欲裸其身又陰脈遲澁故知血亡也

大發其汗傷陽也宜其脈微而惡寒又數大下之傷陰也宜其脈澁而發熱陰陽兩傷則氣血俱損而首末獨言無血者何也曰下之亡陰不必言汗亦血類故也內虛之人夏月陽氣在表則其內無陽也故不勝其寒冬月陽氣在裏裏陰既虛不能當陽之灼爍也故不勝其熱然諸脈弦細而澁按之無力者往往



惡寒苦振慄不止或時發躁蒸蒸而熱如坐甑中必得去衣居寒處或飲寒水則便如故其振寒復至非必遇夏乃寒遇冬乃熱也此但立其例論其理耳 王海藏曰六月大熱之氣反得大寒之病氣難布息身涼脈遲何以治之答曰病有標本病熱為本大寒為標用涼則順時而失本用熱則順本而失時故不從乎標本而從乎中治中治者何用溫是也然既曰溫則不能治大寒之病治大寒者非薑附不可若用薑附又似非溫治之例然衰其大半乃止

脈得四至餘病便無令治之足矣雖用薑附是亦中治也  
非溫而何張子和朱彥修皆嘗治六月惡寒之證以寒涼  
藥而愈不可拘於海藏之說大抵用藥之寒熱全視脈之  
遲數也此言脈遲胃冷故取海藏之說爾陰虛則發熱  
冬月發熱者當補其陰使濟于陽而熱自除矣茯苓  
補心湯之類是也若但用寒涼之藥火無所附而升  
走必發躁欲坐井中宜煖藥治之

脈浮而大心下反鞭有熱屬藏者攻之不令發汗屬府

者不令溲數溲數則大便鞭汗多則熱愈汗少則便難  
脈遲尚未可攻

論言脈浮大應發汗反下之為逆此以心下鞭有熱  
知傳邪入裏故舍脈而從證也屬藏者宿屎在藏也  
屬府者小便不利也大便則許攻之小便則不許何  
也曰利大便則內熱除利小便則不能也徒走其津  
液耳故傷寒治小便不利惟汗後脈浮煩渴始用五  
苓散利之耳其他或溫或下或和解或泄濕熱或固

下散寒或溫經散濕或解錯雜之邪或散傳陰之熱  
閉未嘗輕事乎分利也既言不令發汗不令溲數故  
又繼之曰溲數則大便鞭汗多則熱愈甚汗少則大  
便難以發汗利小便亡其津液致有此失故不可不  
慎也遲為陰為寒為藏腎者至陰之藏故病之所主  
曰腎虛若遽攻之恐洩腎氣所以得此脈者雖具當  
攻之證未可遽攻徐俟之以觀其變可也或曰論言  
結胸脈浮大不可下下之即死而此又言宜下何矛

盾也曰心下鞭與結胸不同結胸又與痞不同病發于陽下之成結胸病發于陰下之成痞結胸痛痞不痛所謂發于陰者謂裏已受邪但下證未全而遽下之故結而為痞視結胸為稍輕痞與結胸既有陰陽輕重之別則結胸之禁不可施之痞也故太陽病醫下之心下痞按之濡其脈關上浮者大黃黃連瀉心湯主之則夫按之鞭未經下者其當攻可知也如陽明病心下鞭滿不可攻之攻之利遂不止者死要須

詳審勿令誤也

脈浮而洪身汗如油喘而不休水漿不下體形不仁乍靜乍亂此為命絕也

火之將滅也必明脈來浮洪涌盛此將去人體之兆也然得此脈者又必薰下一二證而後可斷其命絕也

又未知何藏先受其災若汗出髮潤喘不休者此為肺先絕也

肺主氣主皮毛故也經曰病人肺絕三日死何以知之口張但氣出而不還

陽反獨留形體如煙熏直視搖頭此心絕也

心之于卦離也陽外而陰內也陽反獨留則心血已盡而惟浮游之火獨光耳經曰病人心絕一日死何以知之肩息回視立死一云目停停二日死

唇吻反青四肢厥習者此為肝絕也

肝脈支者從目系下頰裏環唇內經曰病人肝絕八

日死何以知之面青但欲伏眠目視而不見人汗出如水不止一云二日死

環口黧黑柔汗發黃者此為脾絕也

脾其華在唇四白環口黧黑其華萎矣經曰病人脾絕十二日死何以知之口冷足腫腹熱臙脹泄利不覺出無時度一云五日死

溲便遺失狂言目反直視者此為腎絕也

經曰病人腎絕四日死何以知之齒為暴枯面為正



黑目中黃色腰中欲折自汗出如流水一云人中平  
七日死

又未知何藏陰陽前絕若陽氣前絕陰氣後竭者其人  
死身色必青陰氣前絕陽氣後竭者其人死身色必赤  
腋下溫心下熱也

靈樞經曰人有兩死而無兩生故陰竭則身青而冷  
陽竭則身赤而溫又云五陰氣俱絕則目系轉轉則  
目運目運者為志先死志先死則遠一日半死矣六

陽氣絕則陰與陽相離離則腠理發泄絕汗乃出故  
旦占夕死夕占旦死此所謂陰陽即藏府也

寸口脈浮大而醫反下之此為大逆浮則無血大則為  
寒寒氣相搏則為腸鳴醫乃不知而反飲冷水令大汗  
出水得寒氣冷必相搏其人必餒跌陽脈浮浮則為虛  
浮虛相搏故令氣餒言胃氣虛竭也脈滑則為噦此為  
醫咎責虛取實守空迫血脈浮鼻中燥者必衄也

脈大病當熱而曰寒者似指所傷之邪而言也然下

文曰水得寒氣冷必相搏則似又以寒為胃中之虛寒矣既是真寒而非邪熱又何以見大脈邪寒氣相搏氣是何氣浮脈也虛浮脈之因也脈與因何以相搏此皆吾所不能解也成氏亦依回釋之而不復致疑何哉餉與噎通噦即俗謂之呃逆者是也李東垣王海藏以噦為乾嘔而陳無擇又以噦名效逆皆失之按靈樞經云噦以草刺鼻嚏嚏而已無息而疾迎引之立已大驚之亦可已今之呃逆以此三法施之

則立止若以施之乾嘔嘔不為止也且嘔自有嘔條  
而又別出此不已贅乎若古之所謂效即今之所謂  
嗽與呃逆又無干也餉與噦皆因妄下之後復與之  
水以發其汗胸中虛氣逆而作輕則為餉重則為噦  
以跌陽脈候之浮則為餉滑則為噦餉即東垣書所  
載咽喉噎塞口開目瞪之證然無聲也噦則氣自膈  
下直衝上出於口而吃吃然作聲頻頻相續為實可  
治半時噦一聲為虛難治也夫餉者止為水寒相搏

以小青龍湯去麻黃加附子散其水寒而可矣至于  
噦則又有熱氣擁鬱氣不得通而成者輕則和解之  
重則有攻下之候熱病至噦則病已極非若渴煩等  
輕緩之候也論云脈浮發熱口乾鼻燥能食者則衄  
黃芩湯主之

諸脈浮數當發熱而灑淅惡寒若有痛處飲食如常者  
蓄積有膿也

傷寒書舉類傷寒四證為脚氣為痰飲為傷食為虛煩

至于癰疽之發憎寒壯熱大似傷寒仲景已論及而後人乃忽之甚可歎也然人身有焮腫痛楚之處未有不自覺者此條所舉必是內癰故曰畜積有膿也素問云肝滿腎滿肺滿皆實即為腫王注云滿謂脈氣滿實腫謂癰腫大抵口中欬即胸中隱痛心胸甲錯振寒脈數咽乾不渴時出濁唾腥臭久久吐膿如米粥者肺癰也小腹重而強按之則痛便數似淋時時汗出復惡寒身皮錯腹皮急如腫狀脈滑而數者

腸靡也胃脘隱隱而痛手不可近胃脈沈細人迎逆而盛者胃脘靡也內傷外感以人迎氣口別之故內傷之脈人迎平而胃脘癰之脈人迎反盛未有不誤以為傷寒者宜辨之早也京口錢氏室女患腸癰發熱庸醫作傷寒治之絕其飲食旬餘而斃垂斃之日下膿數升方知是癰欲救已無及矣嗚呼仲景之書豈可以弗讀哉

脈浮而遲面熱赤而戰惕者六七日當汗出而解反發熱者差遲遲為無陽不能作汗其身必痒也

脈浮而遲陽氣虛所以遲也氣怫鬱不得越故面熱  
赤正與邪爭故戰惕猶天氣溽蒸而成雨豈不可以  
汗乎而陽氣衰微不作汗故當六七日傳經已盡當  
汗出而解之時而反發熱其身不痛而痒也經曰諸  
痒為虛是也論云太陽病如瘧狀若脈微惡寒面反  
有熱色而身痒者桂枝麻黃各半湯小汗之

寸口脈陰陽俱緊者法當清邪中於上焦濁邪中於下  
焦清邪中上名曰潔也濁邪中下名曰渾也陰中於邪



必內慄也表氣微虛裏氣不守故使邪中於陰也陽中於邪必發熱頭痛項強頸攣腰痛脛酸所為陽中霧露之氣故曰清邪中上濁邪中下陰氣為慄足膝逆冷便溺妄出表氣微虛裏氣微急三焦相溷內外不通上焦怫鬱藏氣相熏口爛蝕斷也中焦不治胃氣上衝脾氣不轉胃中為濁榮衛不通血凝不流若衛氣前通者小便赤黃與熱相搏因熱作使遊於經絡出入藏府熱氣所過則為癰膿若陰氣前通者陽氣厥微陰無所使客氣

內入噦而出之聲喑咽塞寒厥相逐為熱所擁血凝自下狀如豚肝陰陽俱厥脾氣孤弱五液注下下焦不闔清便下重令便數難臍築湫痛命將難全

成氏注以沉浮分陰陽為太陽少陰俱有緊脈但浮而緊者太陽也沉而緊者少陰也又論文但言寸口則不得以關前為陽關後為陰故不得不以浮沉分之然古人所云寸口多兼關尺而言如難經及後章所云水下二刻一周循環當復寸口虛實見焉皆謂

手太陰之經渠穴也知此則不必曲為疏解而無診  
下焦于寸部之謬矣此所言邪似是濕邪蓋有天之  
濕霧露雨是也天本乎氣故中上中表中經絡有地  
之濕水泥是也地本乎形故中下中裏中筋骨今既  
明言清邪為霧露之氣矣則所謂濁邪者非地之濕  
氣而何內經曰風者上先受之濕者下先受之又云  
清濕地氣之中人也必從足始若濁邪是寒邪則足  
太陽當先受之不應獨中下焦而見足膝逆冷便溺

妄出之證也或曰審爾則與濕痺脈證不同何也曰  
濕痺重而此輕惟重則濕氣內流而趨下故其脈沉  
細其證關節疼痛而煩身色如熏黃惟輕則所傷者  
陰冷之氣而已故其脈緊其證頭痛項強腰痛與傷  
寒同也惟濁邪中下焦則與傷寒異以其徑犯藏府  
筋骨肌肉而不止于經絡故耳內慄者身不戰而但  
心惕惕然慄也難經論五邪以中濕為腎邪其病足  
脛寒而逆則此云足膝逆冷為腎中濕邪明甚其便

溺妄出者則河間所謂邪客於腎部手足厥陰之經  
迂孔鬱結極甚而血氣不能宣通則痿痺神無所用  
故津液滲入膀胱而旋溺遺失不能收禁也然則治  
之奈何曰治天之濕當同司天法濕上甚而熱者平  
以苦溫佐以甘辛以汗為效而止當於傷寒法中選  
用治地之濕當同在泉法濕淫於內治以苦熱佐以  
酸淡以苦燥之以淡泄之如四逆白通之類亦可也  
三焦者原氣之別使主通行上中下之三氣經歷於

五藏六府也通行三氣即紀氏所謂下焦稟真元之氣即元氣也上達至於中焦中焦受水穀精悍之氣化為榮衛榮衛之氣與真元之氣通行達於上焦也三焦通則上下內外左右皆通也今表氣微虛裏氣微急三焦相溷則內外不通矣上焦病則鬱熱內發而為口糜蝕斷中焦病則痺不能化胃之所納而胃中為之濁胃中濁則無水穀之精氣以為榮無水穀之悍氣以為衛而榮衛何由通也榮衛不通則血凝

汭而不流矣夫人之所以生者榮衛耳榮衛不通而  
可以久乎榮行脈中衛行脈外不能一時而通必有  
先後欲知榮與衛之孰為先通則於何而驗之若衛  
氣先通者必先小便赤黃而後發癰膿若榮氣先通  
者必先噎嗝咽塞而後下血如豚肝也內經謂三焦  
者決瀆之官水道通焉膀胱者州都之官津液藏焉  
氣化則能出矣夫豈獨從下焦膀胱之氣化而已肺  
主通調水道下輸膀胱而脾病者九竅不通小便不

利是小便亦從上中二焦之氣化者也故衛氣通則小便赤黃也內經論噎或因寒氣下臨心氣上從或因熱氣下臨肺氣上從李明之云陽氣不得出者曰塞陰氣不得下降者曰噎又曰塞者五藏之所主陰也血也噎者六府之所主陽也氣也二者皆由陰中伏陽而作也由此觀之則噎塞皆陰陽寒熱相搏之候耳故曰寒厥相逐為熱所擁血凝自下狀如豚肝衛氣者溫分肉充皮膚肥腠理司開闔故其通也以



潰膿榮氣者其津液注之于脈化以為血以榮四末  
注五藏六府故其通也以下血也若榮衛之氣畢竟  
不通則陰陽俱厥脾氣孤弱不能散精上歸于肺通  
調水道故五藏之液注下下焦不闔數至圜而難無  
氣以出之故也臍中如築拘急而痛腎間動氣將絕  
故也故曰命將難全

脈陰陽俱緊者口中氣出唇口乾燥蹠卧足冷鼻中涕  
出舌上胎滑勿妄治也到七日已來其人微發熱手足

溫者此為欲解或到八日已上反大發熱者此為難治  
設使惡寒必欲嘔也腹內痛者必欲利也

此脈此證表裏陰陽混淆未的疑似之間慎勿妄投  
藥餌徐而俟之若七日之外當解之候微熱手足溫  
則為邪氣解而自愈矣若八日以上當解不解反發  
大熱此為逆證不可治也

脈陰陽俱緊至於吐利其脈獨不解緊去入安此為欲  
解若脈遲至六七日不欲食此為晚發水停故也為未

解食自可者為欲解

成脈陰陽俱緊為寒氣甚於上下至於吐利之後緊脈不罷者為其脈獨不解緊去則入安為欲解若脈遲至六七日不欲食者為吐利後脾胃大虛內經曰飲入於胃游溢精氣上輸於脾脾氣散精上歸於肺通調水道下輸膀胱水精四布五經並行脾胃氣強則能輸散水飲之氣若脾胃氣虛則水飲內停也所謂晚發者後來之疾也若至六七日而欲食者則脾

胃已和寒邪已散故云欲解 緊病脈當作三節看  
病六七日手足三部脈皆至大煩而口噤不能言其人  
躁擾者必欲解也

成煩熱也傳經之時病人身大煩口噤不能言內作  
躁擾則陰陽爭勝若手足三部脈皆至為正氣勝邪  
氣微陽氣復寒氣散必欲解也

若脈和其人煩目重臉內際黃者此為欲解也

成脈經曰病人兩目皆中有黃色起者其病方愈病

以脈為主若目黃大煩脈不和者邪勝也其病為進  
目黃大煩而脈和者為正氣已和故云欲解

脈浮而數浮為風數為虛風為熱虛為寒風虛相搏則  
灑淅惡寒也

成內經曰有者為實無者為虛氣并則無血血并  
則無氣風則傷衛數則無血浮數之脈風邪併於  
衛衛勝則榮虛也衛為陽風搏於衛所以為熱榮  
為陰榮氣虛所以為寒風併於衛者發熱惡寒之

證具矣

張古今皆以數脈為熱今仲景以數脈為虛寒何也  
數則為虛乃陰陽偏負之理非專寒而專熱也浮為  
陽浮數為陽虛沉為陰沈數為陰虛陽虛者則惡寒  
藥用溫熱抑陰扶陽陰虛者則發熱藥用寒涼抑陽  
扶陰使二氣平其病自愈且如病在表脈浮而數乃  
陰盛陽虛汗之則愈下之則死病在裏脈沉而數乃  
陽盛陰虛下之則愈汗之則死經論昭然非有差別

脈浮而滑浮為陽滑為實陽實相搏其脈數疾衛氣失度浮滑之脈數疾發熱汗出者此為不治

成浮為邪氣并於衛而衛氣勝滑為邪氣并於榮而榮氣實邪氣勝實擁於榮衛則榮衛行速故脈數疾一息六至曰數平人脈一息四至衛氣行六寸今一息六至則衛氣行九寸計過平人之半是脈數疾知衛氣失其常度也浮滑數疾之脈發熱汗出而當解若不解者精氣脫也必不可治經曰脈陰陽俱盛大

汗出不解者死

傷寒欬逆上氣其脈散者死謂其形損故也

成千金方以喘嗽為欬逆上氣者肺病散者心脈是心火刑於肺金也內經曰心之肺謂之死陰死陰之屬不過三日而死以形見其損傷故也 此內傷也

問曰脈有三部陰陽相乘榮衛血氣在人體躬呼吸出入上下於中因息遊布津液流通隨時動作效象形容春弦秋浮冬沉夏洪察色觀脈大小不同一時之間變



無經常尺寸參差或短或長上下乖錯或存或亡病輒  
改易進退低昂心迷意惑動失紀綱願為具陳令得分  
明師曰子之所問道之根源脈有三部尺寸及關

成寸為上部關為中部尺為下部 按此下後人以  
為出王叔和今按脈經載張仲景論脈止此一條則  
知非叔和自撰也

榮衛流行不失銓銓

成衡銓者稱也可以稱量輕重內經曰春應中規夏

應中矩秋應中衡冬應中權榮行脈中衛行脈外榮  
衛與脈相隨上下應四時不失其常度也

腎沉心洪肺浮肝弦此自經常不失銖分

成腎北方水王於冬而脈沉心南方火王於夏而脈  
洪肺西方金王於秋而脈浮肝東方木王於春而脈  
弦此為經常銖分之不差也

出入升降漏刻周旋水下二刻一周循環

成人身之脈計長一十六丈二尺一呼脈行三寸一

吸脈行三寸一呼一吸為一息脈行六寸一日一夜  
漏水下百刻人一萬三千五百息脈行八百一十丈  
五十度周於身則一刻之中人一百三十五息脈行  
八丈一尺水下二刻人二百七十息脈行一十六丈  
二尺一周於身也脈經之行終而復始若循環之無  
端也

當復寸口虛實見焉

成經脈之始從中焦注于手太陰寸口二百七十息

脈行一周身復還至於寸口寸口為脈之經始故以  
診視虛實焉經曰虛實死生之要皆見于寸口之中  
變化相乘陰陽相干風則浮虛寒則牢堅沉潛水畜支  
飲急弦動則為痛數則熱煩

成風傷陽故脈浮虛寒傷陰故脈牢堅瀦積於內者  
謂之水畜故脈沉潛支散於外者謂之支飲故脈急  
弦動則陰陽相搏相搏則痛生焉數為陽邪氣勝陽  
勝則熱煩焉

設有不應知變所緣三部不同病各異端

成脈與病不相應者必緣傳變之所致三部以候五藏之氣隨部察其虛實焉

太過可怪不及亦然邪不空見中必有奸審察表裏三焦別焉知其所舍消息診看料度藏府獨見若神為子條記傳與賢人

成太過不及之脈皆有邪氣干於正氣審察在表在裏入府入藏隨其所舍而治之

師曰呼吸者脈之頭也

成難經曰一呼脈行三寸一吸脈行三寸以脈隨呼吸而行故言脈之頭也 此乃診入門之要法

初持脈來疾去遲此出疾入遲名曰內虛外實也初持脈來遲去疾此出遲入疾名曰內實外虛也

成外為陽內為陰內經曰來者為陽去者為陰是出以候外入以候內疾為有餘有餘則實遲為不足不足則虛來疾去遲者陽有餘而陰不足故曰內虛外

實來遲去疾者陽不足而陰有餘故曰內實外虛

問曰上工望而知之中工問而知之下工脈而知之願聞其說師曰病家人請云病人苦發熱身體疼痛病人自卧師到診其脈沉而遲者知其差也何以知之表有病者脈當浮大今脈反沉遲故知愈也

成望以觀其形證問以知其病所苦脈以別其表裏病若發熱身疼邪在表也當卧不安而脈浮數令病人自卧而脈沉遲者表邪緩也是有裏脈而無表證

則知表邪當愈也

假令病人云腹內卒痛病人自坐師到脈之浮而大者知其差也何以知之若裏有病者脈當沉而細今脈浮大故知愈也

成腹痛者裏寒也痛甚則不能起而脈沉細今病人自坐而脈浮大者裏寒散也是有表脈而無裏証也則知裏邪當愈是望證問病切脈三者相參而得之可謂十全之醫鍼經曰知一為上知二為神知三神



且明矣

師曰病家人來請云病人發熱煩極明日師到病人向壁卧此熱已去也設令脈自和處言已愈

發熱煩極則不能靜卧令向壁靜卧知熱已去

設令向壁卧聞師到不驚起而盼視若三言三止脈之  
嚙唾者此詐病也設令脈自和處言汝病太重常須服  
吐下藥鍼灸數十百處乃愈

成詐病者非善人以言恐之使其畏懼則愈醫者意

也此其是歟此非治法設為詐病規模彼以詐病此以詐治

師持脈病人欠者無病也

成鍼經曰陽引而上陰引而下陰陽相引故欠陰陽不相引則病陰陽相引則和是欠者無病也

脈之呻者病也

呻為吟呻之聲身有所苦則然也

言遲者風也

成風客於中則經絡急舌強難運用也

搖頭言者裏痛也

成裏有病欲言則頭為之戰搖

行遲者表強也

成表強者由筋絡引急而行步不利也

坐而伏者短氣也

成短氣裏不和也故坐而喜伏

坐而下一脚者腰痛也

成內經曰腰者身之大關節也腰痛為大關節不利故坐不能正下一脚以緩腰中之痛也

裏實護腹如懷卵物者心痛也

成心痛則不能伸仰護腹以按其痛

師曰伏氣之病以意候之今月之內欲有伏氣假令舊有伏氣當須脈之若脈微弱者當喉中痛似傷非喉痺也病人云實咽中痛雖爾今復欲下利

成冬時感寒伏藏於經中不即發者謂之伏氣至春

分之時伏寒欲發故云今月之內欲有伏氣假有伏氣已發當須脈之審在何經得脈微弱者知邪在少陰少陰之脈循喉嚨寒氣客之必發咽痛腎司開闔少陰治在下焦寒邪內甚則開闔不治下焦不約必成下利故云雖爾咽痛復欲下利

問曰人病恐怖者其脈何狀師曰脈行如循絲累累然其面白脫色也

成內經曰血氣者人之神恐怖者血氣不足而神氣

弱也脈形似循絲累累然面白脫色者鍼經曰血奪者色天然不澤其脈空虛是知恐怖為血氣不足

問曰人不飲其脈何類師曰其脈自濇唇口乾燥也

成濇為陰雖主亡津液而唇口乾燥以陰為主內故不飲也 此節疑有關文

問曰人愧者其脈何類師曰脈浮而面色乍白乍赤

成愧者羞也愧則神氣怯弱故脈浮而面色改變非常也

問曰經說脈有三菽六菽重者何謂也師曰脈者人以指按之如三菽之重者肺氣也如六菽之重者心氣也如九菽之重者脾氣也如十二菽之重者肝氣也按之至骨者腎氣也

成菽豆也難經曰如三菽之重與皮毛相得者肺部也如六菽之重與血脈相得者心部也如九菽之重與肌肉相得者脾部也如十二菽之重與筋平者肝部也按之至骨舉指來疾者腎部也各隨所主之分

以候藏氣

假令下利寸口關上尺中悉不見脈然尺中時一小見脈再舉頭者腎氣也若見損脈來至為難治

成脈經曰冷氣在胃中故令脈不通下利不見脈則冷氣客於脾胃今尺中時一小見為脾虛腎氣所乘脈再舉頭者脾為腎所乘也若尺中之脈更或減損為腎氣亦衰脾復勝之鬼賊相刑故云難治是脾勝不應時也



問曰脈有相乘有縱有橫有逆有順何也師曰水行乘火金行乘木名曰縱火行乘水木行乘金名曰橫水行乘金火行乘木名曰逆金行乘水木行乘火名曰順也成金勝木水勝火縱者言縱任其氣乘其所勝橫者言其氣橫逆反乘所不勝也縱橫與逆縱橫之義通水為金子火為木子子行乘母其氣逆也母行乘子其氣順也

問曰脈有殘賊何謂也師曰脈有弦緊浮滑沉澁此六

者名曰殘賊能為諸脈作病也

成為人病者名曰八邪風寒暑濕傷於外也饑飽勞  
逸傷於內也經脈者榮衛也榮衛者陰陽也其為諸  
經脈作病者必由風寒暑濕傷於榮衛客於陰陽之  
中風則脈浮寒則脈緊中暑則脈滑中濕則脈濇傷  
於陰則脈沉傷於陽則脈浮所以謂之殘賊者傷良  
曰殘害良曰賊以能傷害正氣也

問曰脈有災怪何謂也師曰假令人病脈得太陽與形

證相應因為作湯比還送湯如食頃病人乃大吐若下利腹中痛師曰我前來不見此證今乃變異是名災怪又問曰何緣作此吐利答曰或有舊時服藥今乃發作故名災怪耳

成醫以脈證與藥相對而反變異為其災可怪故名災怪 自三菽六菽以下至災怪脈凡五段皆診治之法

問曰東方肝脈其形何似師曰肝者木也名厥陰其脈

微弦濡弱而長是肝脈也肝病自得濡弱者愈也

成難經曰春脈弦者肝東方木也萬物始生未有枝葉故脈來濡弱而長故曰弦是肝之平脈肝病得此脈者為肝氣已和也

假令得純弦脈者死何以知之以其脈如弦直是肝藏傷故知死也

成純弦者謂如弦直而不軟此中無胃氣為真藏之脈內經曰死肝脈來急益勁如新張弓弦

南方心脈其形何似師曰心者火也名少陰其脈洪大而長是心脈也心病自得洪大者愈也

成心王於夏夏則陽外勝氣血淖溢故其脈洪大而長也

假令脈來微去大故名反病在裏也脈來頭小本大者故名覆病在表也上微頭小者則汗出下微本大者則為關格不通不得尿頭無汗者可治有汗者不治

成心脈來盛去衰為平來微去大是反本脈內經曰

大則邪至小則平微為正氣大為邪氣來以候表來  
微則知表和去以候裏去大則知裏病內經曰心脈  
來不盛去反盛此為不及病在中頭小本大者即前  
小後大也小為正氣大為邪氣則邪氣先在裏今復  
還於表故名曰覆不云去而止云來者是知在表脈  
經曰在上為表在下為裏汗者心之液上微為浮之  
而微頭小為前小則表中氣虛故主汗下出微沉之而  
微本大為後大沉則在裏大則病進內經曰心為牡

藏小腸為之使今邪甚下行格閉小腸使正氣不通故不得尿名曰闕格脈經曰陽氣上出汗見於頭今闕格正氣不通加之頭有汗者則陽氣不得下通而上脫也其無汗者雖作闕格然陽未衰而猶可治也西方肺脈其形何似師曰肺者金也名太陰其脈毛浮也肺病自得此脈若得緩遲者皆愈若得數者則劇何以知之數者南方火火尅西方金治當癰腫為難治也成輕虛浮曰毛肺之平脈也緩遲者脾之脈脾為肺

之母以子母相生故云皆愈數者心之脈火尅金為鬼賊相刑故劇肺主皮毛數則為熱熱客皮膚留而不去則為癰瘍經曰數脈不時則生惡瘡

問曰二月得毛浮脈何以處言至秋當死師曰二月之時脈當濡弱反得毛浮者故知至秋死二月肝用事肝脈屬木應濡弱反得毛浮者是肺脈也肺屬金金來尅木故知至秋死他皆倣此

成當春時反見秋脈為金氣乘木肺來尅肝奪王脈



而見至秋肺王肝氣則絕故知至秋死也

師曰脈肥人責浮瘦人責沉肥人當沉今反浮瘦人當浮今反沉故責之

成肥人肌膚厚其脈當沉瘦人肌膚薄其脈當浮今肥人脈反浮瘦人脈反沉必有邪氣相干使脈反常故當責之

師曰寸脈下不至關為陽絕尺脈上不至關為陰絕此皆不治決死也若計其餘命死生之期期以月節尅之

也

成脈經曰陽生於寸動於尺陰生於尺動於寸寸脈下不至關者為陽絕不能下應於尺也尺脈上不至關者為陰絕不能上應於寸也內經曰陰陽離缺精氣乃絕此陰陽偏絕故皆決死期以月節尅之者謂如陽絕死於春夏陰絕死於秋冬也

師曰脈病人不病名曰行尸以無王氣卒眩仆不識人者短命則死人病脈不病名曰內虛以有穀神雖困無

苦

成脈者人之根本也。脈病人不病為根本內絕。形雖且強，卒然氣脫，則眩運僵仆而死。不曰行尸而何人病脈不病，則根本內固。形雖且羸，止內虛，爾穀神者穀氣也。穀氣既足，自然安矣。內經曰：形氣有餘，脈氣不足，死脈氣有餘，形氣不足，生。

問曰：翕奄沉，名曰滑。何謂也？沉為純陰，翕為正陽。陰陽和合，故令脈滑。關尺自平。陽明脈微沉，食飲自可。少陰

脈微滑滑者緊之浮名也此為陰實其人必股內汗出  
陰下濕也

成脈來大而盛聚而沉謂之翕奄沉正如轉珠之狀  
也沉為藏氣故曰純陰翕為府氣故曰正陽滑者陰  
陽氣不為偏勝也關尺自平陽明脈微沉者當陽部  
見陰脈則陰偏勝而陽不足也陽明胃脈胃中陰多  
故食飲自可少陰脈微滑者當陰部見陽脈則陽偏  
勝而陰不足也以陽湊陰分故曰陰實股與陰少陰

之部也今陽熱湊陰必熏發津液泄達於外服內汗  
出而陰下濕也 許沉為純陰翕為正陽陰陽和合  
故名滑古人論滑脈雖云往來前却流利宛轉替替  
然與數相似仲景三語而足也 按翕奄沉三字狀  
得滑字最好夫翕者合也奄者忽也當脈氣合聚而  
盛之時奄忽之間即已沉去是名滑也仲景恐人誤  
認滑脈為沉故下文又曰滑者緊之浮名也曰沉曰  
浮若異而同更須慧解觀上文緊者如轉索無常也

一句則知浮為轉索無常之浮非輕手便得有常之名也沉為翕奄之沉非重取乃得一定之說也仲景下字具有史筆不可草草看過故趙嗣真曰今人不解作秦漢文字觀可謂善讀仲景之書矣

問曰曾為人所難緊脈從何而來師曰假令亡汗若吐以肺裏寒故令脈緊也假令欬者坐飲冷水故令脈緊也假令下利以胃中虛冷故令脈緊也

陽舒緩陰急縮陰化為寒摯然收斂氣血以堅其為

脈也寧得不急經曰緊脈帶數如切繩狀一曰如轉索無常故有寒則見

寸口衛氣勝名曰高

寸口通關尺而言高謂脈來浮而有力衛氣主表浮以候之其體在上今浮中有力是衛氣盛也以其在上故謂之高有升而不降之義焉

榮氣盛名曰章

章明也條也往來分明有條理也今滑脈為血實之

診殆近是乎

高章相搏名曰綱

綱總也以榮衛俱盛故謂之總

衛氣弱名曰慄

舉之濡弱恍忽故謂之慄

榮氣弱名曰卑

榮主血為陰按以候之其脈沉而無力故謂之卑

慄卑相搏名曰損



慄卑相搏陰陽俱虛總謂之損舉按俱無力也

衛氣和名曰緩

緩為胃脈胃合衛氣衛氣和故見緩脈

榮氣和名曰遲

遲為脾脈脾合榮氣榮氣和故見遲脈

遲緩相搏名曰強

榮衛俱和故遲緩相搏不亦強乎

寸口脈緩而遲緩則陽氣長其色鮮其顏光其聲商毛

髮長遲則陰氣盛骨髓生血滿肌肉緊薄鮮鞭陰陽相抱榮衛俱行剛柔相搏名曰強也

此釋上一句之義此為平脈非病脈也

跌陽脈滑而緊滑者胃氣實緊者脾氣強持實擊強痛還自傷以手把刃坐作瘡也

成跌陽之脈以候脾胃滑則穀氣實是為胃實緊則陰氣勝是為脾強以脾胃一實一強而相搏擊故令痛也若一強一弱相搏則不能作痛此脾胃兩各強

實相擊府藏自傷而痛譬若以手把刃而成瘡豈非自貽其害乎按此則敦阜大過之脈也

寸口脈浮而大浮為虛大為實在尺為關在寸為格關則不得小便格則吐逆

成經曰浮為虛內經曰大則病進浮則為正氣虛大則為邪氣實在尺則邪氣關閉下焦裏氣不得下通故不得小便在寸則邪氣格拒上焦使食不得入故吐逆 丹謹按難經云吸入腎與

肝夫盈天地之間者一元之氣也氣之升者為陽氣之降者為陰腎足少陰也肝足厥陰也位居下主吸與入其所吸之氣不能達腎至肝而還者此陰之弱也浮大之脈屬陽見于寸者陽氣偏盛陰不得配之也為格主吐逆此無陰則嘔謂見于尺者陰血不足陽往乘之也為關主不得小便此東垣滋腎丸之意跌陽胃脈氣不宣血不濡名曰關格主水穀不化與食不得入亦陽有

餘陰不足故有升而無降也何註文不之及而以邪氣關格閉拒為言歟

跌陽脈伏而濇伏則吐逆水穀不化濇則食不得入名曰關格

成伏則胃氣伏而不宣中焦關格正氣壅塞故吐逆而水穀不化濇則脾氣濇而不布邪氣拒于上焦故食不得入有婦人病吐逆大小便不通煩亂四逆漸無脈一日與大承氣湯二盞至半夜漸得大便

煩亂漸舒脈漸生翼日乃安即此是關格也宜審之  
脈浮而大浮為風虛大為氣強風氣相搏必成癰疹身  
體為痒痒者名泄風久久為痂癩

成痂癩者眉少髮稀身有乾瘡而腥臭內經曰脈風  
成癰

寸口脈弱而遲弱者衛氣微遲者榮中寒榮為血血寒  
則發熱衛為氣氣微者心內飢飢而虛滿不能食也

成衛為陽榮為陰弱者衛氣微陽氣不足也遲者榮

中寒經中客邪也榮客寒邪搏而發熱也陽氣內微心  
內雖飢飢而虛滿不能食也 緩遲與弱遲雖止一  
字之差却有千里之謬成氏不合註而分解無怪其  
上下不相同也

跌陽脈大而緊者當即下利為難治

成大為虛緊為寒胃中虛寒當即下利下利脈當微  
小反緊者邪氣也故云難治經曰下利脈大者為未  
止 大為實大為虛上下紛紛更易不一者只要識

得虛者正氣虛實者邪氣實之義 已上以脈知病  
寸口脈弱而緩弱者陽氣不足緩者胃氣有餘噫而吞  
酸食卒不下氣填於膈上也

成弱者陽氣不足陽能消穀陽氣不足則不能消化  
穀食緩者胃氣有餘則胃中有未消穀物也故使噫而  
吞酸食卒不下氣填于膈上也金匱要略曰中焦未  
和不能消穀故令噫 弱緩與遲緩亦不同

跌陽脈緊而浮浮為氣緊為寒浮為腹滿緊為絞痛浮



緊相搏腸鳴而轉轉即氣動膈氣乃下少陰脈不出其陰腫大而虛也

成浮為胃氣虛緊為脾中寒胃虛則滿脾寒則痛虛寒相搏腸鳴而轉轉則膈中之氣因而下泄也若少陰脈不出則虛寒之氣至于下焦結于少陰而聚于陰器不得發泄使陰腫大而虛也

寸口脈微而濇微者衛氣不行濇者榮氣不足榮衛不能相將三焦無所仰身體痺不仁榮氣不足則煩疼口

難言衛氣虛則惡寒數欠三焦不歸其部上焦不歸者噫而酢吞中焦不歸者不能消穀引食下焦不歸者則遺洩

成夫養成三焦者血也護三焦者氣也榮衛俱損不相將而行三焦無所依仰身體為之頑痺而不仁內經曰榮氣虛則不仁鍼經曰衛氣不行則為不仁榮為血血不足則煩疼榮屬心榮弱心虛則口難言衛為陽陽微則惡寒衛為氣氣虛則數欠三焦因榮衛

不足無所依仰其氣不能歸其部金匱要略曰上焦  
竭善噫上焦受中焦氣中焦未和不能消穀故令噫  
耳下焦竭即遺溺失便以上焦在膈上物未化之分  
也不歸者不至也上焦之氣不至其部則物未能傳  
化故噫而酢吞中焦在胃之中主腐熟水穀水穀化  
則思食中焦之食不歸其部則水穀不化故云不能  
消穀引食下焦在膀胱上口主分別清濁澼小便也  
下焦不歸其部不能約制澼便故遺澼 三焦病各

分其證自有三法存焉

跌陽脈沉而數沉為實數消穀緊有病難治

成沉為實者沉主裏也數消穀者數為熱也緊為肝脈見於脾部木來尅土為鬼賊相刑故云難治按緊與弦當有分別恐未可便以緊為弦也首卷曰弦則為減金匱要略曰脈緊如轉索無常者有宿食也以義求之則弦為虛而緊為實矣

寸口脈微而濇微者衛氣衰濇者榮氣不足衛氣衰面

色黃榮氣不足面色青榮為根衛為葉榮衛俱微則根葉枯槁而寒慄欬逆唾腥吐涎沫也

子能令母虛肺主氣氣虛則脾色見於面而黃心主血血衰則肝見於面而青肺臭腥脾液涎也榮虛則寒慄衛虛則欬逆

跌陽脈浮而芤浮者衛氣衰芤者榮氣傷其身體瘦肌肉甲錯浮芤相搏宗氣衰微四屬斷絕

成經曰衛氣盛名曰高高者暴狂而肥榮氣盛名曰

章章者暴澤而光其身體瘦而不肥者衛氣衰也肌肉甲錯而不澤者榮氣傷也宗氣者三焦歸氣也四屬者皮肉脂髓也榮衛衰傷則宗氣亦微四屬失所滋養致斷絕矣

寸口脈微而緩微者衛氣疎疎則其膚空緩者胃氣實實則穀消而水化也穀入於胃脈道乃行而入於經其血乃成榮盛則其膚必疎三焦絕經名曰血崩

成衛為陽微為亡陽脈微者衛氣疎衛溫分肉肥腠

理衛氣既疎皮膚不得溫肌則空虛也經曰緩者胃  
氣有餘有餘為實故云緩者胃氣實內經曰食入於  
胃淫精於脈是穀入於胃脈道乃行也鍼經曰飲而  
液滲於絡合和於血是水入於經其血乃成也胃中  
穀消水化而為血氣今衛疎榮盛是榮氣強而衛氣  
弱也衛氣弱者外則不能固密皮膚而氣為之疎內  
則不能衛護其血而血為之崩經常也三焦者氣之  
道路衛氣疎則氣不循常度三焦絕其常度也 按

經文曰而入於經則而字乃承上文穀字水亦在其  
中矣註引鍼經水入於經乃是互文以見意仲景獨  
重於穀故用而字若欠理會則血為水所化也豈理  
也哉玩合和於三字則成氏之說未瑩

跌陽脈微而緊緊則為寒微則為虛微緊相搏則為短  
氣

成中虛且寒氣自短矣

少陰脈弱而瀋弱者微煩瀋者厥逆



成煩者熱也少陰脈弱者陰虛也陰虛則發熱以陰部見陽脈非大虛也故生微煩厥逆者四肢冷也經曰陰陽不相順接便為厥厥者手足厥冷是也少陰脈濇者陰氣濇不能與陽相順而接故云逆也此段不當作二證

跌陽脈不出脾不上下身冷膚鞭

成脾胃為榮衛之根脾能上下則水穀消磨榮衛之氣得以行脾氣虛衰不能上下則榮衛之氣不得通

營於外故跌陽脈不出身冷者衛氣不溫也膚鞭者榮血不濡也

少陰脈不至腎氣微少精血奔氣促迫上入胸膈宗氣反聚血結心下陽氣退下熱歸陰股與陰相動令身不仁此為尸厥當刺期門巨闕

成尸厥者為其從厥而生形無所知其狀若尸故名尸厥少陰脈不出則厥氣客於腎而腎氣微少精血厥氣上奔填塞胸膈壅遏陽氣使宗氣反聚而血結

心下鍼經曰五穀入於胃其糟粕精液宗氣分為三  
隧宗氣積於胸中出於喉嚨以貫心肺而行呼吸又  
曰榮氣者泌其津液注之於脈化而為血以榮四末  
令厥氣太甚宗氣反聚而不行則絕其呼吸血結心  
下而不流則四體不仁陽氣為厥氣所擁不能宣發  
退下至陰股間與陰相動仁者柔也不仁者言不柔  
和也為寒熱痛痒俱不覺知者也陽氣外不為使內  
不得通榮衛俱不能行身體不仁狀若尸也內經曰厥

氣上行滿脈去形刺期門者以通心下結血刺巨關者以行胸中宗氣血氣流通厥氣退則甦矣


寸口脈微尺脈緊其人必虛損多汗知陰常在絕不見陽也

成寸微為亡陽尺緊為陰勝陽微陰勝故云虛損又加之多汗則愈損陽氣是陰常在而絕不見陽也

寸口諸微亡陽諸濡亡血諸弱發熱諸緊為寒諸乘寒者則為厥鬱冒不仁以胃無穀氣脾瀼不通口急不能

言戰而慄也

成衛陽也微為衛氣微故云亡陽榮血也濡為榮氣弱故云亡血弱為陰虛虛則發熱緊為陰勝故為寒諸乘寒者則陰陽俱虛而為寒邪乘之也寒乘氣虛抑伏陽氣不得宣發遂成厥也鬱冒為昏冒不知人也不仁為強直而無覺也為尸厥焉以胃無穀氣致脾瀼不通於上下故使口急不能言戰者寒在表也慄者寒在裏也



證治準繩卷五十二